

इवनिंग डोगरी न्यूज़ बुलेटिन

समे .18:20 Hrs

<><><><><><>

Headlines

1. सरकार आप्रेशन सिंदूर दी पच्छौक्कड़ै च 59 सांसदें दी शमूलियत आहले 7 सर्वदलीय प्रतिनिधिमंडलें गी 32 मुखें दा दौरा लाने लेई भेज्जोग, जेड़ा आतंकवाद खलाफ भारत दे सांझे संकल्प गी दर्शाग।
2. मंत्री जावेद राणा होरें आखेआ जे जम्मू-कश्मीर दे हर इक थाहर दी प्रगति यकीनी कीती जाग।
3. भारत ते पाकिस्तान बश्कार डी.जी.एम.ओ सतह दी गल्लबात अज्ज आसतै तय नेई ऐ ही।
4. जल शक्ति मैहकमें आसेआ 2024-25 च 6 ज्हार 122 ग्राम थवां 2 लख 66 ज्हार पीने आहले पानी दे नमूने दी जांच कीती गई।
5. क्रिकेट च अज्ज दिल्ली दे अरुण जेटली स्टेडियम च संझा साइडे 7 बजे दिल्ली कैपिटल्स दा मुकाबला गुजरात टाइटन्स कन्नै होग।

<><><><><><>

All-Party Delegations

संसदीय कार्य मंत्री किरन रिजिजू होरें घोषणा कीती ऐ जे आप्रेशन सिंदूर दे तैहत 7 सर्वदलीय प्रतिनिधिमंडल तौले गै प्रमुख देशें कन्नै गल्लबात करडन। एह आतंकवाद दे खलाफ भारत दे सांझे संकल्प गी दर्शादा ऐ। इक्क सोशल मीडिया पोस्ट च रिजिजू होरें इस सांझे मोर्चे दी नुमायंदगी करने आहले सांसदें ते प्रतिनिधिमंडलें दी सूची सांझी कीती। इनें बक्ख-बक्ख समूहें च जम्मू-कश्मीर थमां वरिष्ठ नेता गुलाम नबी आजाद, नेशनल काँग्रेस नेता मिया अल्ताफ ते बीजेपी दे गुलाम अली खटाना होर बी शामिल न। आकाशवाणी संवाददाता नै जानकारी दिती ऐ जे भाजपा सांसद बैजयंत पांडा हूंदी अगुवाई च पैहला समूह साउदी अरब, बहरीन, कुवैत ते अल्जीरिया दा दौरा करोग। इस प्रतिनिधिमंडल च भाजपा सांसद निशिकांत दुबे, ए.आई.एम.आई.एम सांसद असदुद्दीन औवैसी ते वरिष्ठ नेता गुलाम नबी आजाद शामिल होडन। भाजपा सांसद रविशंकर प्रसाद हूंदी अगुवाई च दुआ समूह यू.के, फ्रांस, जर्मनी, यूरोपीय संघ, इटली ते डेनामार्क दा दौरा करोग। इस प्रतिनिधिमंडल च कांग्रेस सांसद डॉ. अमर सिंह, शिव सेना (यू.बी.टी) सांसद प्रिया चतुर्वेदी, बीजेपी सांसद गुलाम अली खटाना ते साबका केंद्री मंत्री एम. के अकबर शामिल होडन। जनता दल (यू) सांसद संजय कुमार झा हूंदी अगुवाई च त्रीया समूह इंडोनेशिया, दक्खन कोरिया, जपान ते सिंगापुर दा दौरा करोग। इस प्रतिनिधिमंडल च तृणमूल कांग्रेस दे युसुफ पठान, CIP (M) दे जान ब्रिटान ते कांग्रेस नेता सलमान खुर्शीद शामिल होडन। शिव सेना सांसद श्रीकांता एकनाथ शिंदे हूंदी अगुवाई च चौथा समूह यू.ए.आई, लाइबेरिया, कांगो ते सिएरा लियोन दा दौरा करोग। बीजेपी दियां बांसुरी स्वराज, बीजेडी दे ससमित पात्रा, इंडियन यूनियन्स मुस्लिम लीग सांसद ई.टी

मोहम्मद बशीर ते साबका केंद्री मंत्री एस.एस आहलूवालिया होर बी इस समूह दा हिस्सा होडन। 5में प्रतिनिधिमंडल दी अगुवाई कांग्रेस सांसद शशि थरूर होर करंगन जेड़ा अमरीका, पनामा, गुआना, ब्राजील ते कोलंबिया दा दौरा करोग। एहदे च जे.एम.एम सांसद सरफराज अहमद, एल.जे.पी सांसद शाम्भवी, टी.डी.पी सांसद जी.एम हरीष बालयोगी ते शिवसेना सांसद मुरली देयोरा शामिल होंगन। इससै चाल्ली 6में प्रतिनिधिमंडल दी अगुवाई डी.एम.के सांसद कनीमोझी करुणानिधि होर करंगन जेड़ा स्पेन, ग्रीस, Slovenia, Latvia ते रूस दा दौरा करोग। इस समूह च एन.सी थमां सांसद मियां अल्ताफ अहमद सने समाजवादी पार्टी थमां सांसद राजीव राय ते आर.जे.डी दे सांसद प्रेम चंद गुप्ता हिस्सा लैडन। एनसीपी (एससीपी) सांसद सुप्रिया सुले हुंदी अगुवाई च सतमा समूह मिस्र, कतर, इथोपिया ते दक्खनी अफ्रीका दा दौरा करोग। इस प्रतिनिधिमंडल च भाजपा दे राजीव प्रताप रूडी ते अनुराग सिंह ठाकुर हुंदे कन्नो-कन्नी कांग्रेस सांसद मनीष तिवारी होर बी शामिल होंगन।

<><><><><><>

Rana-Progress

जल शक्ति मंत्री जावेद राणा होरें Harni थवां बी.जी रोड बालाकोट तगर शिड़क पर लुक्क पाने दे कम्मै दी शुरूआत करोआई। एहदा मकसद ग्रामीण शिड़क राबते गी बेहतर करना ऐ। एहदे कन्नै मुकामी बसनीकें गी ते आले दोआले दे लोकें गी लाह होग। इस मौके पर किट्ठ गी संबोधित करदे होई राणा होरें लोकें गी मुबारकबाद दिती ते ग्रामीण ढांचे दे विकास लेई मुखमंत्री उमर अब्दुल्ला हुंदी सरकार दी बचनबद्धता गी फी दोहराया। उनें आखेआ जे सरकार खिते दे पूरे-पराते विकास ते ग्रामीण ढांचे गी बेहतर करने लेई बचनबद्ध ऐ।

<><><><><><>

Army-DGMO

भारतीय सेना नै आखेआ ऐ जे भारत ते पाकिस्तान बश्कार ऐतवारें डी.जी.एम.ओ सतह दी गल्लबात दा बैठक दी कोई बी योजना नेई ही। इयां खबर आवा रदी ही जे संघर्ष विराम आरजी हा ते एह अज्ज खत्म होआ रदा ऐ। भारती सेना नै उनें खबरें गी खारिज करी दिता जे भारत ते पाकिस्तान बश्कार डी.जी.एम.ओ सतह दी गल्लबात होनी ऐ। सेना आसेआ दस्सेआ गेआ ऐ जे ऐसी कोई गल्लबात तय नेई ऐ ते सीजफायर गी जारी रखने दा जित्थे तगर सौआल ऐ एहदी कोई म्याद तय नेई कीती गेदी ऐ।

<><><><><><>

Water-Testing

केंद्र शासित प्रदेश च पीने आहले पानी दी सप्लाई पूरी चाल्ली सुरक्षित ऐ ते एहदे पर पूरी नजर रखी जा करदी ऐ। पानी दे म्यार ते पूरे सरिस्ते दी निगरानी कीती जा रदी ऐ। माली बरे 2024-25 च कुल 2 लक्ख 66 ज्हार नमूने दी जांच कीती गई। एह नमूने 6 ज्हार 122 ग्राम थवां लैते गए। इन्दे चा 78

नमूने च पानी गंदा पाया गेआ पर एह आरजी हा कीजे एहदे च मौसमी गड़बड़ी ही जेड़ी ज्यादातर भारी बरखें करी आम तौर पर होई जंदी ऐ।

<><><><><><>

Tiranga-Rally

रियासी कस्बे च तिरंगा रैली कड़ी गई। एह रैली आप्रेशन सिंदूर दी सफलता दे सरबंध्य च कड़ी गई। इस रैली दौरान भारतीय सशस्त्र बलें दे शौर्य ते दलेरी गी नमन कीता गेआ। इस रैली दा मकसद एकता ते अखंडता दी भावना गी उजागर करना हा। इस रैली च महिलाएं बी हिस्सा लैता। आकाशवाणी समाचार कन्नै गल्ल करदे होई किश मुकामी लोकें आखेआ।

साम्बा च बी अज्ज बीजेपी आसेआ तिरंगा रैली कड़ी गई। एहदे च बीजेपी कारकून ते आम लोकें हिस्सा लैता। इस मौके पर साम्बा, विजयपुर ते रामगढ़ थवां विधायक सुरजीत सिंह सलाथिया, चंद्र प्रकाश गंगा ते डॉ. देवेंद्र कुमार मनेयाल होरें हिस्सा लैता। इस मौके पर आकाशवाणी समाचार कन्नै गल्ल करदे होई साम्बा थवां विधायक सुरजीत सिंह सलाथिया होरें आखेआ।

<><><><><><>

Museum Day

अजैब घरें सरबंध्य अज्ज अंतरराष्ट्रीय ध्याड़ा ऐ जिसी म्यूजियम डे यानि संग्रहालय दिवस दे रूपै च मनाया जंदा ऐ। इस मौके पर मुख्य भरै च पुरातत्व सर्वेक्षण विभाग दे संरक्षण आहले सब्बनै स्मारकें, परानिएं ईमारतें ते अजैब घरें च लोकें गी मुफ्त जाने दी छूट ही। इस्सै सिलसिले च अज्ज उधमपुर च प्राचीन क्रिमची मंदरें गी बी लोकें लेई खोलेआ गेआ। इस मौके पर उधमपुर दियां डिप्टी कमिशनर सलोनी राय होर मुख परौहने दे तौरा पर मौजूद हियां। मौके पर बोलदे होई उनें आखेआ।

इस्सै चाल्ली क्रिमची मंदरें च दौरा लांदे होई विद्यार्थियें च इक नै आकाशवाणी समाचार कन्नै अपने विचार सांझे करदे होई गलाया।

तोआई, डिप्टी कमिशनर सलोनी राय होरें अज्जै दे मौके पर क्रिमची पांडव मंदर आहली थाहर दे क्यू.आर स्कैनर दा बी उद्घाटन कीता।

<><><><><><>

IPL-Cricket

IPL क्रिकेट च अज्ज दा मुकाबला दिल्ली दे अरुण जेटली स्टेडियम च दिल्ली कैपिटल्स ते गुजरात टाइटन्स बशकार खेड़ेआ जाग। मैच संझा साइडे 7 बजे शुरू होग। गुजरात दी टीम 11 मुकाबले सोआं 16 अंक लेइयै तालिका च दुई थाहर पर ऐ ते अज्जै दा मुकाबला जितने मगरा ओहदा प्लेऑफ च पुज्जना पक्का होई जाग। दिल्ली दी टीम दे 11 मुकाबले सोयां 13 अंक न ते ओह 5मीं थाहर पर ऐ।

तोआई, पिछले बरे दे विजेता कोलकाता नाइट राइडर्स दी टीम प्रतियोगिता थमां बाहर होई गई ऐ कीजे कल संझा भारी बरखा कारण बिजन टॉस दे गै रायल चैलेंजर्स ते कोलकाता नाइट राइडर्स दा मैच रद्द होई गेआ हा।

<><><><><><>

Doda-Tribal Welfare

डोडा जिले च जनजातीय सरबन्धी कल्याण गी ध्यानै च रखदे होई डोडा दे डिप्टी कमिशनर हरविंद सिंह होरें बक्ख-बक्ख जनजातीय सरबन्धी योजनाएं दी अमलावरी दा जायजा लैने लेई इक समीक्षा बैठक दी अध्यक्षता कीती। बैठक च भिड़ पालन, योजना, शिक्षा ते राजस्व मैहकमे दे अधिकारियें दे अलावा जनजातीय समुदाय दे प्रतिनिधियें बी हिस्सा लैता। डी.सी होरें योजनाएं दी असरदार अमलावरी लेई समेबद्ध तरीका अपनाने लेई गलाया ते बैठक दौरान पुट्टे गेदे मसलें दे तौले नबेड़े लेई प्रशासन दी प्रतिबद्धता गी फी पक्का कीता तां जे समावेशी जनजातीय विकास गी यकीनी बनाया जाई सकै।

<><><><><><>